

王右丞集注

冊三

王右丞集卷之十四

仁和趙殿成松谷箋註

近體詩三十三首

田園樂七首

詩林廣記作輶川六言

出入千門萬戶經過北里南鄰蹀躞鳴珂有底崆峒

散髮何人

顧元緯本凌本出入俱作厭見蹀躞俱作官府

北里南鄰

左思詩南鄰擊鐘磬北里吹笙竽

再見封侯萬戶立談賜璧一雙詎勝耦耕南畝何如

高臥東牕

立談

解嘲或立談間而封侯

賜璧

史記虞卿躡屣擔簦一見趙王賜白璧一雙黃金百鎰再見拜爲上卿三見卒受相印封萬戶侯

採菱渡頭風急策杖村西日斜杏樹壇邊漁父桃花

源裏人家

急一本作起村顧元緯本作林

杏壇

莊子孔子遊于緇帷之林休坐乎杏壇之上弟子讀書孔子絃歌鼓琴奏曲未半有漁父者下船而來鬚眉交白被髮揄袂行原以上拒陸而止左手據膝右手持頤以聽

萋萋芳草春綠落落長松夏寒牛羊自歸村巷童稚

不識衣冠

首句諸本皆作萋萋春草秋綠惟唐詩品彙作萋萋芳草春綠今從之又綠字凌本作碧不字萬首唐人絕句作未

長松

孫綽遊天台山賦藉萋萋之纖草蔭落落之長松呂延濟註萋萋草美貌落落松高貌

夏寒

王巾頭陀寺碑文桂深冬煥松疎夏寒

山下孤烟遠村天邊獨樹高原一瓢顏回陋巷五柳

先生對門

高原

揚雄羽獵賦相與列乎高原之上

桃紅復含宿雨柳綠更帶春烟花落家僮未掃鶯啼

山客猶眠

宿萬首唐人絕句作夜春唐詩品彙作朝鶯凌本唐詩品彙俱作鳥○皇甫冉集亦載此首題作閑居六言

酌酒會臨泉水抱琴好倚長松南園露葵朝折東谷

黃梁夜春

東谷凌本唐詩品彙俱作西舍

黃梁

爾雅翼今梁有三種青梁殷穗有毛粒青米亦微青而細于黃白米也夏月食之極為清涼但以味短色惡不如黃白梁故人少種之亦早熟而收少作錫青白勝餘米黃梁穗大

毛長穀米俱麤于白梁而收子少不耐水旱食之香味逾于諸梁人號為竹根黃白梁穗亦大毛多而長穀麤扁長不似粟圓米亦白而大其香美為黃梁之亞古天子之飯所以有白梁黃梁者明取黃白二種耳

少年行四首

新豐美酒斗十千咸陽遊俠多少年相逢意氣為君

飲繫馬高樓垂柳邊

萬首唐人絕句本多作皆意氣作氣味

斗十千

曹植詩歸來宴平樂美酒斗十千

出身仕漢羽林郎初隨驃騎戰漁陽孰知不向邊庭

苦縱死猶聞俠骨香

苦一作死

羽林郎

後漢書羽林郎比三百石無員掌宿衛侍從常選漢陽隴西安定北地上郡西河凡六郡良家補

驃騎

史記元狩二年春以冠軍侯去病為驃騎

將軍將萬騎出隴西有功正義曰漢書霍去病征匈奴有絕幕之勳始置驃騎將軍位至三司品秩同大將軍

漁陽

章懷太子後漢書註漁陽郡在漁水之陽今幽州

俠

骨香

張華遊俠曲生從命子遊死聞俠骨香得各蓋傷之也與太白縱死俠骨香不慚世上英同用張華遊俠曲中語而命意不同矣

成按詩意謂死于邊庭者反不如俠少之死而

一身能擘兩彫弧虜騎千重只似無偏坐金鞍調白

羽紛紛射殺五單于

樂府詩集壁作臂重作羣

擘

顏師古漢書註今之弩以手張者曰擘張以足蹋者曰蹶張

彫弧

玉篇弧木弓也彫弧謂有彫畫之弧

白羽

上林賦鑾轡弱滿白羽文穎註以白羽羽

箭故言白羽也鮑照詩留我一白羽李善註白羽矢名國語曰吳素甲白羽之矰望之如荼

五單于

漢書宣帝紀匈奴虛閭權渠單于病死右賢王屠耆堂代立骨肉大臣立

虛閭權渠單于子為呼韓邪單于擊殺屠耆堂諸王並自立分為五單于更相攻擊死者以萬數

漢家君臣歡宴終高議雲臺論戰功天子臨軒賜侯

印將軍佩出明光宮

雲臺

江淹上建平王書結綬金馬之庭高議雲臺之上

臨軒

後漢書崔寔傳天子臨軒百僚畢會

寄河上段十六

此詩亦載盧象集中

與君相見即相親聞道君家在孟津為見行舟試借

問客中時有洛陽人

盧集見作識在作住

贈裴旻將軍

腰間寶劍七星文臂上瑠弓百戰勳見說雲中擒黠

虜始知天上有將軍

裴旻

唐書裴旻嘗與幽州都督孫佺北伐爲奚所圍旻舞刀立馬上矢四集皆迎刀而斷奚大驚引去後以龍華軍使守北平北平多虎旻善射一日得虎三十一休山下有老父曰此

彪也稍北有真虎使將軍遇之且敗旻不信怒馬趨之有虎出叢薄中小而猛據地大吼旻馬辟易弓矢皆墜自是不復射李翰裴旻將軍射虎圖贊敘開元中山戎寇邊元宗命將軍守北平州且充

龍華軍使以捍薊之北門公嘗率偏軍橫絕漠策匹馬陷重圍搖驪驪而百萬洞開馳驍馳而沙場一掃聲振北狄氣懾東胡胡人服藝畏威不敢南牧願充麾下者五百餘人

七星

吳越春秋子胥乃解百金之劍以與漁者此吾前君之劍中有七星價值百金孔稚珪詩文犀六屬鎧寶劍七星光吳均詩刀含四尺影劍抱七星文

琯弓

張衡東京賦彫弓斯

穀薛綜註彫弓謂有刻畫也古彫字亦作琯如漢書郊祀志之琯戈貢禹傳之琯牆抱朴子之琯璫其義一也

點虜

後漢書伏湛傳點虜困迫必求其助

九月九日憶山東兄弟

原註時年十七○凌本作九日憶東山兄弟

獨在異鄉爲異客每逢佳節倍思親遙知兄弟登高處徧插茱萸少一人

茱萸

爾雅翼風土記曰俗尚九月九日謂爲上九茱萸至此日氣烈熱色赤可折其房以插頭云辟惡氣禦冬劉禹錫嘉話茱萸二字經三詩人皆已遺亦有能否焉杜公言更把茱萸

仔細看王右丞云徧插茱萸少一人朱放云學他年少插茱萸杜公爲最優也

戲題輞川別業

柳條拂地不須折松樹梢雲從更長藤花欲暗藏猱

子柏葉初齊養麝香

樹凌本作枝梢二顧本凌本俱作披

猱

邢昺爾雅疏猱一名緩善攀援樹枝

麝香

埤雅陶氏云麝形似獐今謂之香獐常食柏葉故養生論云麝食柏而香也

戲題盤石

可憐盤石臨泉水復有垂楊拂酒杯若道春風不解

意何因吹送落花來

盤一作磐臨顧元緯本凌本俱作鄰拂一作梢何因一作因何

與盧員外象過崔處士興宗林亭

綠樹重陰蓋四鄰青苔日厚自無塵科頭箕踞長松

下白眼看他世上人

重一作垂松文苑英華作林看他世上人一作看君是甚人

科頭

章懷太子後漢書註科頭謂以髮繫繞成科結也揚伯喈臆乘俗謂不冠為科頭

箕踞

漢書尉佗魋結箕踞見陸賈師古曰箕踞謂伸其兩脚而坐亦曰箕踞其

形似箕

白眼

見十二卷青眼註

同詠

盧象

暎竹時聞轉轆轤當牕只見網蜘蛛主人非病常

高臥環堵蒙籠一老儒

環堵

禮記儒有一畝之宮環堵之室鄭康成註環堵面一堵也五板爲堵孔穎達正義環謂周圍也東西南北唯一堵也淮南子環堵之室茨之以生茅高誘註堵長一丈高一丈面環

一堵爲方一丈故曰環堵言其小也

同詠

王 縉

身名不問十年餘老大誰能更讀書林中獨酌鄰
家酒門外時聞長者車

長者車

史記陳平家乃貧郭窮巷以弊席爲門然門外多有長者車轍

同詠

裴 迪

喬柯門裏自成陰散髮牕中曾不簪逍遙且喜從
吾事榮寵從來非我心

牕中劉本顧可久本俱作空中唐詩品彙作空牕

喬柯

劉孝綽詩喬柯貫簷上垂條拂戶陰

酬王摩詰過林亭

唐詩紀事作喜羣公訪林亭

崔興宗

窮巷空林常閉關悠悠獨臥對前山今朝忽枉嵇

生駕倒屣開門遙解顏

空唐詩紀事作深

嵇生駕

世說嵇康與呂安善每一相思千里命駕

解顏

列子夫子始一解顏而笑

送王尊師歸蜀中拜掃

二顧本俱無拜掃字

大羅天上神仙客濯錦江頭花柳春不爲碧雞稱使

者惟令白鶴報鄉人

大羅天

雲笈七籤最上一天名曰大羅在元都玉京之上紫微金闕七寶臺樹麒麟獅子化生其中三世天尊治在其內

濯錦江

太平寰宇記濯錦江

卽蜀江水至此濯錦錦彩鮮潤于他水故曰濯錦江九域志笮橋江水亦名濯錦江俗云以此水濯錦鮮明

碧雞

漢書郊祀志或言益州有金馬碧雞之神可醺祭而致于是遣

諫大夫王褒使持節而求之如淳註金形似馬碧形似雞水經註靖嶺縣有禺同山其山神有金馬碧雞光景儵忽民多見之漢宣帝遣諫大夫王褒祭之欲致其雞馬褒道病而卒是不果焉故左太

冲蜀都賦曰金馬驕光而絕影碧雞儵忽而耀儀王褒碧雞頌曰持節使者敬移金精神馬影

白

鶴搜神後記丁令威本遼東人學道于靈虛山後化鶴歸遼集城門華表柱時有少年舉弓欲射之鶴乃飛徘徊空中而言曰有鳥有鳥丁令威去家千年今來歸城郭如故人民非何不學仙

象鼻壘遂
高上冲天

送元二使安西

詩人玉屑作贈別樂府詩集作渭城曲

渭城朝雨裊輕塵客舍青青柳色新
勸君更盡一杯酒西出陽關無故人

次句劉本萬首唐人絕句樂府詩集俱作客舍青青柳色春又一本作客舍依依楊柳春

成按詩人玉屑以此詩爲折腰體謂中失粘而意不斷也唐人歌入樂府以爲送別之曲至陽關句反覆歌之謂之陽關三疊亦謂之渭城曲白居易晚春欲攜酒尋沈四著作作詩云最憶陽關唱真珠一串歌註云沈有謳者善唱西出陽關無故人詞又對酒詩云相逢且莫推辭醉聽唱陽關第四聲註云第四聲勸君更盡一杯酒西出陽關無故人也劉禹錫與歌者詩云舊人惟有何戡在更與殷勤唱渭城渭城陽關之名蓋因詩中辭云

送別

萬首唐人絕句題作齊州送祖三

送君南浦淚如絲君向東州使我悲
爲報故人顛顚盡如今不似洛陽時

州顧元緯本凌本俱作周

南浦

江淹別賦送君南浦傷如之何

淚如絲

梁武帝詩臉下淚如絲

東州

後漢書樊準傳雖有西屯之役宜先東州之急章懷太子註東州謂

冀充州

送韋評事

欲逐將軍取右賢沙場走馬向居延遙知漢使蕭關外愁見孤城落日邊

評事

唐書百官志大理寺有評事八人從八品下

右賢

史記元朔之五年春漢令車騎將軍衛青將三萬騎出高闕匈奴右賢王當衛青等兵以爲漢兵不能至此飲

醉漢兵夜至圍右賢王右賢王驚夜逃獨與其愛妾一人壯騎數百馳潰圍北去漢輕騎校尉郭成等逐數百里不及得右賢裨王十餘人

靈雲池送從弟

金杯緩酌清歌轉畫舸輕移豔舞迴自歎鵲鴒臨水別不同鴻雁向池來

靈雲池

高適集有陪竇侍御泛靈雲池陪竇侍御靈雲南亭燕詩二首其序云涼州近胡高下其池亭蓋以耀蕃落也意此池卽涼州之靈雲池矣

鵲鴒

張華禽經注鵲鴒雀屬也爾雅曰鵲鴒離渠毛詩曰水鳥也大如雀高足長尾尖喙頸黑青灰色腹下正白飛則鳴行則搖又曰鵲鴒在原兄弟急難鵲鴒共母者飛吟不相離詩人取以喻兄弟相友之道也

送沈子福歸江東

二顧本俱無福字歸萬首唐人絕句唐詩品彙俱作之

楊柳渡頭行客稀
罟師盪槳向臨圻
惟有相思似春色
江南江北送君歸

臨圻

謝靈運詩臨圻阻參錯李善註
埤蒼曰碣曲岸頭也碣與圻同

寒食汜上作

文苑英華作寒食汜水山中作國秀集作途中口號

廣武城邊逢暮春
汶陽歸客淚沾巾
落花寂寂啼山

鳥楊柳青青渡水人

汜上

元和郡縣志河南府有汜水縣西南至府一百八十里汜水出縣東南三十二里浮戲山經武牢城東漢破曹咎于此

廣武城

杜氏通典河南府汜

水縣古東號國爲鄭滅之鄭爲制邑左傳曰制嚴邑也有故虎牢城卽周穆王獲虎命畜之故曰虎牢漢謂之成皋縣後漢置成皋關其側有廣武城

汶陽

漢書地理志魯國有

汶陽縣元和郡縣志故汶陽城在兗州龔邱縣東北五十四里其城側土田沃壤故魯號汶陽之田成二年齊歸我汶陽之田謂此地也

劇嘲史寔

清風細雨濕梅花
驟馬先過碧玉家
正直楚王宮裏

至門前初下七香車

菩提寺禁裴迪來相看說逆賊等凝碧池上作

音樂供奉人等舉聲便一時淚下私成口號誦

示裴迪萬首唐人絕句作菩提寺禁聞逆賊凝碧池上作樂

萬戶傷心生野煙百官何日再朝天秋槐葉落空宮

裏凝碧池頭奏管絃官唐詩紀事全唐詩話珊瑚鉤詩話俱作察再二顧本明皇雜錄唐詩紀事全唐詩話唐詩品彙俱作更葉珊瑚鉤詩話作花

空唐詩紀事珊瑚鉤詩話俱作深

菩提寺長安志平康坊南門之東有菩提寺隋開皇二年隴西公李敬道及僧惠英所奏立寺唐昭陵圖菩提寺在麻池之下與香積寺近賈氏談錄賈君嘗自說太原軍前衛

命至永興軍催發馬草舍于菩提寺僧有智滿者言祖師宏道天寶末為寺主值祿山犯闕王右丞為賊所執囚于經藏院與左丞裴迪密相往來裴說賊會蕃漢兵馬宴于太極西內王聞之泣下遂

為詩二絕書于經卷麻紙之後祖師收得之相傳至智滿賈君既獲披閱遂錄得其辭云萬戶傷心生野煙云云又示裴迪安得捨塵網云云凝碧池明皇雜錄天寶末羣

賊陷兩京大掠文武朝臣及黃門官嬪樂工騎士每獲數百人以兵仗嚴衛送于維陽至有逃于山谷者而卒能羅捕追脅授以冠帶祿山尤致意樂工求訪頗切于旬日獲梨園弟子數百人羣賊因

相與大會于凝碧池宴僞官數十人大陳御庫珍寶羅列于前後樂既作梨園舊人不覺歔歔相對泣下羣逆皆露刃持滿以脅之而悲不能已有樂工雷海青者投樂器于地西向慟哭逆黨乃縛海

青于戲馬殿支解以示衆聞之者莫不傷痛王維時為賊拘于菩提佛寺聞之賦詩云云唐禁苑圖凝碧池在西內苑重元門之北飛龍院之南

涼州賽神

原註時爲節度判官在涼州作

涼州城外少行人百尺峯頭望虜塵健兒擊鼓吹羌
笛共賽城東越騎神

健兒

唐六典天下諸軍皆有健兒成按稱軍士爲健兒蓋本于三國時考吳志陳表傳云權以表能得健兒之心甘寧傳云能厚養健兒健兒亦樂爲用命凌統傳云統爲前鋒與所厚

健兒數十人共乘一船呂範傳云範親客健兒募取以歸之類

羌笛

成按說文笛七孔笛也羌笛三孔馬融笛賦曰近世雙笛從羌起羌人伐竹未及已龍鳴水中不見後裁竹吹之聲

相似刻其上孔通洞之裁以當槌便易持易京君明識音律故本四孔加以一君明所加孔後出是爲商聲五音畢然則羌笛本三孔後人加一孔京房又加一孔與今之六孔者不同也

哭殷遙

國秀集唐詩紀事俱作送殷四葬

送君返葬石樓山松柏蒼蒼賓馭還埋骨白雲長已
矣空餘流水向人間

石樓山

元和郡縣志京兆府渭南縣西南有石樓山太平寰宇記隰州石樓縣有石樓山唐書地理志汝州梁縣有石樓山一統志西安府藍田縣有石樓山鳳翔府寶雞縣有

石樓山未知孰是

歎白髮

宿昔朱顏成暮齒須臾白髮變垂髻一生幾許傷心事不向空門何處銷

暮齒

隋書王劭傳爰自志學暨乎暮齒篤好經史遺落世事

垂髻

玉篇髻小兒髮也魏志毛玠傳垂髻執簡累勸取官

王右丞集卷之十四

王右丞集卷之十五

仁和趙殿成松谷箋註

外編四十七首

東溪翫月

顧元緯外編錄此首文苑英華亦作王維詩唐文粹作王昌齡詩

月從斷山口遙吐柴門端萬木分空霽

分唐文粹作紛

流陰中

夜攢光連虛象白氣與風露寒谷靜秋泉響巖深青

靄殘清澄入幽夢

清澄唐文粹作澄清

破影抱空巒

破影唐文粹作影破

恍惚琴牕

裏松溪曉思難

過太乙觀賈生房

顧元緯外編及凌本俱錄此首文苑英華亦作王維詩

昔余棲遁日之子烟霞鄰共攜松葉酒俱簪竹皮巾

攀林遍雲洞

雲一作巖

採藥無冬春謬以道門子徵爲驂御

臣常恐丹液就先我紫陽賓天促萬塗盡哀傷百慮

新蹟峻不容俗才多反累真泣對雙泉水還山無主人

松葉酒

庚肩吾詩方欣松葉酒自和遊仙吟王績詩春釀煎松葉秋盃浸菊花

竹皮巾

漢書高帝為亭長乃以竹皮為冠韋昭曰竹皮竹筠也今南夷

取竹幼時續以為帳師古註竹皮謂箏上所解之籜耳非竹筠也今人亦往往為箏皮巾古之遺製也王績詩橫裁桑節杖直翦竹皮巾

丹液

漢武內傳其次藥有九丹金液

子得服之白日昇天此飛仙之所服地仙之所見也

紫陽賓

周氏冥通記第一紫陽左真人治葛衍山周君第二紫陽右真人治蟠冢山王君

送孟六歸襄陽

一作送孟浩然○顧元緯外編錄此首文苑英華亦作王維詩瀛奎律髓作張子容詩

杜門不欲出

欲瀛奎律髓作復

久與世情疎以此為長策

長一作夏

勸君

歸舊盧醉歌田舍酒笑讀古人書好是一生事無勞

獻子虛

淮陰夜宿二首

以下五首俱見顧元緯外編註云宋本作公詩又載唐孫逖集文苑英華俱編入行邁類亦稱逖作蓋與右丞早入滎陽界諸

詩同紀遂誤作右丞詩耳

水國南無畔扁舟北未期鄉情淮上失歸夢郢中疑